

Nuuk, oktobarip 10-at 2022

Uunga: Aalisarnermut Piniarnermullu Naalakkersuisoqarfik, Nuuk

Tiguisusuaq.: Robin Holmvang

Pissuseqatigiiaat ilaannut 2023-mi TAC-mut tunngasoq

SFG-p ulloq 26/9 avataasiorluni aalisarnermi pissuseqatigiiaat ilaannut tusarniaanermi allakkiaq tiguisimavaa. Tamakkiisumik isigalugu SFG-ip oqaaseqaatissai amerlanatillu siunnersuut naapertuussorineqarpoq. SFG-p allanik allassimasooqanngippat TAC-mut siunnersuut tapersersorpaa.

Pissuseqatigiiaanut tunngatillugu makkuninnga oqaaseqaateqarusuppugut:

Nunatta kitaani avataasiorluni qaleralinniarneq:

- Ukiut marluk ingerlanerini pingasoriarluni 15%-imik annikilliliinissamut pilersaarutitut siunnersuutigineqartoq SFG-mit suli tapersersorneqarpoq, Canadamullu tunngatillugu suliamut pisariaqassappat ikiuuttoqarsinnaavoq.

Nunatta kitaani saarullinniarneq:

- SFG isumaqarpoq nunatta kitaani avataasiorluni saarullinniarneq annikitsumik iluaqutaasumillu ingerlanneqarsinnaasoq. Ullumikkut saarulliit nunatta kitaata avataaniittut pillugit ilisimasat killeqarput. Saarulliit amerlassusaat ukiuni qulikkaani annikitsumik aalisarnerup kingorna naatsorsuutigisanut naleqqiullugu pitsaavallaangitsumik sunnerneqarsimapput, ineriartornerullu tamatuma paasilluarnissaanut ilisimasallu amerlinissaanut aalisartoqartariaqarpoq. Tamatuma saniatigut ilisimatuussutsikkut misissuinerit inernerit malillugit nunatta kitaata avataani saarulliit amerlisimapput, maannalu ukiut 30-t sinnerlugit ingerlaneranni aatsaat taamak amerlatigalutillu ukiuni marlunni kingullerni marloriaatinngorsimapput. Saarulliit amerlisimanerat 2020-mi 2021-milu naatsorsorneqarsimapputaaq, tamannalu ineriartornermik piviusorsiorpalaartumik takutitsisutut ilimagineqarsinnaavoq. GN-ip saarulliit katillugit oqimaassusaat 19.000 tonsitut nalilersimavaa, matumanilu sumiiffimmi raajaqanngitsumi saarulliit ilaatinneqanngimmata, saarulliit katillugit oqimaassusaat annertunerungaatsiassaaq. Taamaammat SFG isumaqarpoq ilisimatuussutsikkut misissuinerimut atugassanik katersisoqarnissaanik piumasaqaatitalimmik aalisalertoqartariaqartoq. Aalisarnerup annertussusaa niuernikkut, pinngortitami pissuseqatigiinnut ilisimatuussutikkullu soqutigisat naapertorlugit aalajangerneqassaaq.

Tunumi kiisalu nunatta kitaata kujataani saarullinniarneq

- SFG-p siunnersuut aqutsinissamut pilersaarummut naapertuummat tapersersorpaa, piujuartitsinermillu tunngavilimmik aalisarnissamut MSC-millu nalunaaqutserneqarnissamut aqqutissaagami pisariaqarpoq. Taamaattorli pissuseqatigiiaat peqqissutut nalilerneqaraluarlutik ukiuni kingullerni aalisapiluttoqarsimaneranik ICES-ip naliliisimanera SFG-p erseqqissaatigerusuppaa. SFG-p Tunumi/Islandimi saarulliit pillugit ataatsimoorussamik aqutsinissaq pillugu Islandimik politikkikkut oqaloqateqalernissaq kajumissaarutigerusuppaa.

Tunami suluppaagarniarneq (kontinentalsocklen):

- *S. nirvegiucus* mut 25.545 tonsit pillugit siunnersuinerup Kalaallit Nunaannut Islandimullu atuunnera allassimasariaqarpoq.
- SFG-mi *S. norvegiucus* naapertorlugu aalisarnerup MSC-mik nalunaaqutsernissaanut periarfissaq eqqartorneqarsimavoq. Pilersaarut nutaaq malillugu aalisarneq ICES-imiit siunnersuineq sipporlugu ingerlarataannaavoq, tamannalu naleqqutinngitsoq SFG isumaqarpoq. Kalaallit Nunaanni siunnersuineq siornatigut Islandimut isumaqatigiissutaasoq attatiinnarneqassasoq taamatuttaarlu Kalaallit Nunaata – Islandip nutaamik isumaqatigiissusiornissaat politikkikkut anguniarneqassasoq SFG taarsiullugu kajumissaarivoq. Suluppaakkat arriitsumik alliaartortarput, aalisarpallaarnerlu piffissami ungasinnerusumi kingunerluuteqarsinnaavoq, uumasooqatigiillu politikkikkut isumaqatigiinnginnermut pilliutaassappata siunissaq ungasinnerusoq eqqarsaatigalugu tamanna aaqqiissutaanngilaq.
- Suluppaakkanut ataqatigiittumik pisassiissutip annertusineratigut *S. mentella*, ”aalisarneqartussaangitsutut” siunnersuiffiusoq, aalisarnerulerneqarsinnaavoq. Saarulliit pissuseqatigiiaat taakku marluk itissutsini assigiinngitsuni uumasuummata Pinngortitaleriffik inuussutissarsiutillillu suleqatigalugit *S. mentella* sapinngisamik sunnerneqannginnissaa qulakkeerniarlugu suluppaagarniarnermi itinerpaaffissaliinissaq SFG-mit innersuutigineqarpoq. *S. mentella* Tunumi pissuseqatigiiaat ukuummata immikkut pingaaruteqarpoq: sukami, ikerinnarmi itinerusumi ikerinnarmilu ikkannerusumi. Taamaalluni pisariaqanngitsumik annertuumik *S. mentella* aalisarneqarpat pissuseqatigiiaat pingasuut ”aalisarneqartussaangitsutut” siunnersuiffigineqarsimasut eqqugaassapput.

Inuulluaqqusilluta

Sustainable Fisheries Greenland